

# Il bov da Lävaz

Ina ditga alpina – en furma nova ed erotica

**(cp) Sonda, ils 5 da november preschenta Claudia Cadruvi ses nov cudesch a chaschun dals Dis da litteratura a Domat. I sa tracta dad ina ditga sursilvana en quatter linguas.** Eis ti ina buoba ni ina femna? – Quei vesas bein. – El sesforza da mirar en fatscha ad ella e vesa ch'ella contempla el. In giuven chatschader vegn in di en la Val da Lävaz. Là inscuntra el ina matta misteriusa che pretenda dad abitar en la val abandunada. L'emprim na sa lascha l'um betg surmanar da la diala che vegn protegida dad in bov. Ma insatge al carmala adina puspè enavos, fin ch'el è piglià en ils latschs da l'amur per la diala...

Jeu less tei. – Allora prendimi.

En la Crestomazia chattan ins mo poucas indicaziuns davart il bov abandonà en la Val da Lävaz. La materia ha dentant fascinà l'autura *Claudia Cadruvi*. La schurnalista che lavura per l'anr ha cumenzà ad elavurar la ditga en pliras versiuns. Naschida è in'istorgia d'amur cun ina nota erotica.

Dentant betg mo quai: La ditga alpina – scritta en l'idiom sursilvan – duai esser accessibla a las lecturas ed als lecturs da tut las regions linguisticas da la Svizra. *Walter Rosselli, Nicolas Bühler e Laura Keller* han transponì la ditga en lingua taliana, franzosa e tudestga. *Marianna Blöchlinger-Spescha* ha procurà il lectorat.

«Il bov da Lävaz» cun sias translaziuns



**Claudia Cadruvi preschenta sia quarta ediziun litterara als Dis da litteratura: «Il bov da Lävaz».**

MAD

porscha a lecturas e lecturs da l'entira Svizra in'invista en la litteratura e cultura alpina dad antruras; entras la nova furma da raquintar vegn dentant era cumpigliada la Rumantschia moderna. Da quai po era sa perschuer il public da Domat sonda proxima, ils 5 da november a las 11.35 en la halla Tircal a chaschun da la vernissascha dal nov cudesch.

**Il program detaglià dals Dis da litteratura chattan ins sin [www.litteraturarumantscha.ch](http://www.litteraturarumantscha.ch)**